

■ PUNTG DA VISTA

Cun interessantas perspectivas

DAD ANDREAS CADONAU

Discurrì han ins bler dad in nov fundament e da vulair crear ina nova chasa il glindesdi passà a Cuira. La Chasa culturala grischuna stat dentant gia dapi blers onns ed il sboz per ina nova lescha culturala n'è franc nagin nov fundament. Il sboz cuntegna dentant in pèr impurtantas novaziuns, la proposta è tut auter che schletta. Ina da quellas novaziuns è la pussaivladad da porscher cunvegnas da prestaziun cun daners dal preventiv chantunal.

Daco che la regenza ha dentant desistì da preschentar definiziuns pli cleras pertugant il dretg e las prestaziuns necessarias per dastgar retschai-ver dal chantun ina cunvegna da prestaziun n'è betg cler. Sin il pli tard cun l'ordinaziun ston quellas directivas esser definidas. I na sa numnadain betg esser ch'il cussegl grond decida davart la finanziaziun da tschertas cunvegnas sin fundament da pressiun politica e grazia ad ina buna represchentan-za da singulas instituziuns en il cussegl grond, quai è arbitrari e quai n'è betg fair.

Ils lavurants culturals èn persunas cultivadas e pledan cler per dapli daners per la bransch culturala. Sa chapescha ch'els na vulan betg lantschar la discussiun tge event cultural ch'è degn da retschaiver ina cunvegna da prestaziun dal chantun e tgenin betg. L'idea ch'il cussegl grond vegnia a conceder dapli daners a la cultura ils proxims onns è dubitavla. Qua giogan la Partida liberaldemocratica e ses president Bruno Claus ina rolla in pau intransparenta. Bruno Claus è sa preschentà al podi da Cuira in pau sco il nov garant politic da la cultura grischuna. Interessant co el declara proximamain a ses novs amis da la cultura grischuna co ins vegn tar dapli daners e dasperas pretender dal chantun mesiras da spargn e da sbassar la taglia.